



# Mmele wa Tlou o moholo

Sesotho

Harold Gondwe



# Mmele wa Tlou o moholo

E ngotswe ke Harold Gondwe  
Motaki wa ditshwantsho ke Karen Ahlschläger



E fetoletswe ke Mpho Ntaka



Kgale kgale Tlou e ne e le morena wa  
diphoofolo tsohle.

Tlou e ne e le bohale ebile e le pelo  
e kgutshwanyane haholo.

Diphoofolo tsohle di ne di e tshaba.

Lentswe la Tlou le ne le kenya tshabo  
e kgolo diphoofolong kaofela.

Ka nako eo Tlou e ne e sena mmele o moholo.

Mmele wa yona o ne o lekane hantle feela  
e lekana le Tau ka boholo.



Hoseng ho hong le ho hong diphoofole tsohle di ne di ya ho tsoma dijo tseo di neng di tlo dija.

Jwaloka diphoofole tsohle, Tlou le yona e ile ya ya ho tsoma dijo tseo etlang ho dija hammoho le lelapa la yona.

Ho ne ho dula ho e na le dijo tse ngata ntlong ya yona, ho ne ho se na kgaello ya dijo ho hang.

Ka letsatsi le leng Tlou ya qala ho ba botswa, yaba e re ka pelong: "Ke nna morena wa diphoofole tsohle leha ho le jwalo ke ya tsoma bakeng sa dijo jwaloka diphoofole tsohle.

Sena se tlameha ho fela. Diphoofole kaofela di lokela ho ntlisetsa dijo mona ntlong ya ka."



Jwale Tlou a elellwa hore ha a sa potlake ho tla ka leano, o tla bolawa ke tlala hammoho le ba lelapa la hae hobane o ne a se a le botswa haholo.

Yaba Tlou o tla ka leano. O ile a tsheha a le mong a utlwahala a re: "O a bona leano lena la ka le tla etsa bonnete ba hore ha ke ye ho tsoma ho hang."

Tlou a bitsa Mmutlanyana eleng yena mosebeletsi wa hae.





Mmutlanyana a tla ka pele ho Tlou a re:

Ke nna enwa Morena wa ka, nka o sebeletsa jwang kajeno?

Mmutlanyana o ne a tshaba Tlou haholo.

Ha Mmutlanyana a ne a ka etsa phoso, Tlou o ne a mo tsipa ditsebe ho fihlela di etswa madi.

Ya ba Tlou o re "ho tla ba le tlala mmusong ona, ho keke ha na pula ka nako e telele.

Ha ho letho le tla mela kahoo he, bolella diphoofolo tsohle hore di lokela ho tlisa le ho boloka dijo ntlong ya ka."

Tlou ya rialo ka lentswe le phahameng.

Ke eng seo o lakatsang hore ke se etse Morenaka? Mmutlanyana a botsa.



Tlou a re ho Mmutlanyana. O tle o mmamele ka hloko, ke a tseba hore ditsebe tsa hao ha di utlwe hantle. Haebe o ka etsa phoso, re tlo qabana haholo feela.

Ke o utlwa hantle Morena. Nke ke ka etsa phoso eo. Ke a o tshepisa ke tla kgutla ka pele, Mmutlanyana a rialo a ntse a matha ka potlako.

Baheso, morena wa rona Tlou a re ho tloha hosane le ise dijo tsa lona ntlong ya hae hobane ho tla ba le tlala le lenyora haufinyane mme o batla hore a re bolokele dijo ntlong ya hae.

Mmutlanyana o ile a mathela hohle mmusong wa Tlou a tsebisa diphoofolo tsohle ka molaetsa wa morena ho tsona.



Thutlo ha a utlwa sena o ile a re: Eya o bolelle morena wa hao hore” nke ke ka lapa, difate di ngata.”

Ke dumellana le wena Thutlo, ho rialo Phokojwe.



Kgele! Morena enwa o na le mathata. Re ka boloka dijo tsa rona ha bonolo ka malapeng a rona. Ho rialo Phiri ka bohale.



Le nna ke dumellana le wena motswalle wa ka, re ka ipolokela dijo tsa rona matlong a rona. Ho bolela Phuti.

Nke ke ka etsa jwalo, ha ke ye moo, ho rialo Tau a ntse a tswela pele ho ja nama ya hae.





Diphoofolo tse ding tsona di ile tsa mamela taelo ya Tlou mme tsa isa dijo ha Tlou.

Ka mora matsatsi a seng makae, ntlo ya Tlou e ne e fletse dijo.

Tlou o ile a tsheha a le mong ha a hlokomela hore leano la hae le sebeditse.

A qala ho ja ntho e nngwe le e nngwe eo a e ratang. Ene e le nama, ditholwana le yona meroho.

Ka ho sa hlokomele, mmele wa Tlou le ba lelapa la hae e ile ya e ba meholo le ho feta, maoto a tsona le ditsebe tsa tsona di ile tsa hola kapele haholo.





Tlou a elellwa hore o entse phoso ka leano la hae la botswa hobane a eleletswe hore mmele wa hae o ntse o ba moholo.

Ka dinako tse ding a leka ho ikwetlisa ho netefatsa hore mmele wa hae ha o eketsehe ka boholo.

Leha ho le jwalo boholo ba mmele wa hae bo ile ba tswela pele ho hola.

Tlou a utlwahala a re ka pelong: "Ke entse phoso e kgolo, jwale ke flameha ho ja makala a difate feela. Ke tlohele ho ja ntho e nngwe le e nngwe e le hore mmele wa ka o tle o fokotsehe."

Tlou o ne a tletse maswabi empa ka bomadimabe tshenyeho e ne e se e etsahetse.



Mmutlanyana o ile a bona hore ho na le se sa tsamayeng hantle ka morena wa hae.

O ile a botsa Morena potso ena: "Morena wa ka, naa ha o phele hantle?"

Naa ke shebahala ke kula ho wena?

Tlou a botsa a halefile. Mmutlanyana, o seke wa nkgalefisa.

Naa ha o na mosebetsi oo o ka o etsang?

Tjhe, Morena wa ka, ke mpa ke kgathatsehile ha ke bona hore mmele wa hao o ntse o hola letsatsi le letsatsi. Ho rialo Mmutlanyana.



Nka o thusa ka meriana ya ho theola boima ba mmele, e sebetsa haholo, ho rialo Mmutlanyana a ntse a tsheha lekunutung.

Ha ke a re ke hloka thuso ya hao Mmutlanyana, naa o a nkutlwa?

Nka o fa meriana ha fela o ka mpha seo ke se batlang. Ho rialo Mmutlanyana a batla ho kgelosa le ho phelephanyetsa Tlou.



Tlou ka bohale a re: Tloha ho nna, ke tla o bolaya hona jwale. O na ke mmele wa ka, ha ke tsebe hore na ke hobaneng ha o tshwenyehile ka ona.

Ke ne ke batla hore o nketse Morena kgwedi e le nngwe ha o ntse o nwa meriana ya ho fokotsa boima ba hao.

Seo se ke ke sa etsahala, Tlou a leka ho phamola Mmutlanyana, mme Mmutlanyana a tlola kapelenyana.

O ke ke wa ntshwara, hopola hore boholo ba mmele wa hao bo eketsehile haholo. Mmutlanyana a tsheha.





Leano la hao le o sebeletsa hantle Tlou hobane o botswa. Sheba kamoo o leng ka teng jwale, Mmutlanyana a tswela pele ho soma Tlou.

Tlou a itholela hobane a elellwa hore ha ho na letho leo a ka le etsang ntle le ho ja makala a difate. O ne a tshepile hore ka ho etsa sena o tla fokotsa boholo ba mmele wa hae.

Ka bomadimabe, ho fihlela kajeno, boholo ba mmele wa Tlou ha bo a ka ba fokotseha ho hang.

# **DITEBOHO**

**E ngotswe ke**

Harold Gondwe

**Motaki wa ditshwantsho ke**

Karen Ahlschläger

**Mohlophisi**

Mavis Ndlovu

**Moqapi**

PixelPing Design

**Mofetoledi**

Mpho Ntaka

**Mosireletsi wa Boleng**

Matebogo Makhutle



ISBN 978-0-638-00753-4



**basic education**  
Department:  
Basic Education  
REPUBLIC OF SOUTH AFRICA

